

Maikel Su Tres Mayor

Siman pasá *Breakpoint* a informá su lektornan ku na Ontario, Canada tin un kaso preokupante dilanti hues. Un mucha hòmbler di dos aña (ku nos lo yama Maikel) pronto por tin **tres mayor legal**. Naturalmente Maikel tin su tata i mama. Ma segun nos ta komprendé, e mama ta biba ku un partner lèsbian i nan dos ta hasi petishon pa e partner lèsbian bira Maikel su segundo mama. I e tata ta di akuerdo, yamando e parner lèsbian di su kasá “un bon amiga di e mayornan”.

Loke ta diferente den e kaso aki ta ku ningun esfuerso ta hasí pa remplasá un mayor (manera sa sosodé ku adopshon). Alkontrario den e kaso aki e deseo ta pa agregá un di tres mayor. Abogada di e partner lèsbian a bisa, “Esaki ta un famia ku ta stima otro, i nan a hasi tur loke e komunidad ta rekerí pa proveé pa e mucha. Nan solamente ke rekonosementu legal. Nan ta bisa ku den nan famia tin espasio pa tres mayor.” I hues den e kaso aki ya kaba a ekspresá su simpatia pa e tres adultonan konserní

Nos Kreador Su diseño di matrimonio i e famia tabata ún (1) hòmbler i ún (1) muhé. “*Un hòmbler lo bandoná su tata i su mama i lo uni ku su esposa. I nan lo bira ún karni*” (Gènesis 2:24). Dios sa kon hende—tantu adulto komo mucha—por funshoná optimal. **Su diseño di e famia ta perfekto!** No por mehor’é!

Di otro banda por bisa ku ta bèrdat ku ningun famia ta perfekto. Nunca kos ta kamna perfekto ora tin dos òf mas pekadó bou di un dak. (I kua di nos no ta pekadó?) Mas i mas nos ta deskubrí e afektonan devastadó pa un mucha ku ta lamta den un kas unda tin un mayor so. Hopi mama òf tata soltero ta hasi nan máksimo esfuerso pa bienestar di nan yunan. Tòg echu ta ku dos mayor ta keda e modèl mas saludabel pa e yunan.

Ma kiko lo sosodé si nos ta bandoná e diseño di nos Kreador di dos mayor legal? 1) Un resultado sigur lo ta konfushon...ken ta responsabel pa kiko? Ku dos mayor mes tin ora tin siertu konfushon pa ku ròl di kada un. Kòrda ora tin mas ku dos... 2) Fásilmente un mayor lo neglighá su responsabilidad. “Mi por keda sin kumpli ku mi responsabilidad pasobra ya kaba dos otro adulto ta hasi nan parti.” 3) Rechaso di e konsepto di dos mayor eventualmente lo guia na algu ku no ta sirbi. Si tres mayor ta aseptabel, pakiko no por tin un famia ku kuater, sinku òf dies mayor? I si hues por agregá òf kita kuantu mayor ku e ta haña ta bon, pusíbelmente e yu no ta ku su mayornan biológiko mas. 4) Ora adultonan ta falta dedikashon total pa ku un i otro, lo tin mas kiebro di relashonnan inter-personal, produsiendo mas instabilidad pa e mucha. E mucha lo keda konfundí, sin sa ken e por konfia.

Ningun di esakinan ta e kaso ku e relashon ku un mucha tin ku su welo i wela, tante i tio, èts. E kontakto ei normal ta fortifiká e relashon di e mucha pa ku su mayornan.

Un di e Dies Mandamentunan ta bisa, “*Onra bo tata i bo mama...*” (Eksodo 20:12). Si e kaso aki ta bai den direkshon ku e ta pinta ku e hues-aktivista ke p’e bai, talbes nos lo mester kambia e mandamentu pa lesa, “Onra bo tata i bo tata i bo tata i bo mama i bo mama i bo mama i bo mama i bo...” Ta ridikulo pa pensa ku un mucha lo mester onra dos òf tres tata i dos òf tres mama komo su mayornan.

E implikashonnan di e kaso aki ta grandi. Tin hopi enemigu di Dios Su diseño pa e famia i matrimonio awendia. Nan ta hasi máksimo esfuerso pa introdusí nan mes ideanan. Si nos ke protehá nos famianan i e Maikelnan den nos mundu, **nos tin ku risití tur esfuerso pa kambia e model ku nos Kreador a introdusí.** I un di e modèlnan sigur ku ta bai kontra e plan divino ta Maikel su tres mayor.